

Powšitkowne WOZJEWJENJA

njedźelu, 7. apryla 2013

Na Přizjewjenja Knjeza w Róžeńće Boža mša

Swjedzeń Přizjewjenja Knjeza, kotryž swjeći cyrkej poprawom 25. měrca, je so lětsa martrowneho tydźenja dla na póndźelu, 8. apryla, přepołožił. Boža mša w Róžeńčanskej swjatnicy budže póndźelu, 8. apryla, w 9 hodź. Wšitcy wěriwi su wutrobnje přeprošeni.

Prapremjera duchowneho oratorija „Serbske jutry“

Nowy duchowny oratorij „Serbske jutry“ z pjera Jana Cyža a Chrysty Meškankoweje zaklinči přeni raz sobotu, 13. apryla, w 19.30 hodź. w Chróšćanskej cyrkwi. Tuta hudźbna twórba nastaj so składnostnje 150. róčnicy wobstaća Towarstwa Cyrila a Metoda z.t. a wuchadźenja Katolskeho Posoła. Pod wumělskim nawodom Friedemanna Böhme hraje orchester Serbskeho ludoweho ansambla (SLA) z dalšimi hudźbnikami, spěwaja chóry Meja, Lilija, Delany a cyrkwinske chóry z Chróšćic, Njebjelčic a Wotrowa kaž tež chóraj Bratrowstwa a SLA. Solistiske džěle přewozmu Daniela Hazec, Tanja Donatec, Michal Foršta a Gerald Schön. Chróšćanscy wosadni dujerjo, šola a Jakub Hantuš jako řečnik w nowym duchownym oratoriju tohorunja sobuskutkuja. Wopytowarjo smědža so na wosebitu hudźbnu chłóšćenku wjeselić. Druhe předstajenje oratorija budže njedźelu, 14. apryla, w 17 hodź. w Chróšćanskej cyrkwi. Zastup je darmotny, za wudawki prosy pak so wo pjenježny dar do korbika při durjach. Wšitcy zajimcy su wutrobnje přeprošeni.

Nalětni koncert w Haslowje

Skupina JANKAHANKA wuhotuje tutu njedźelu, 7. apryla, w 15.30 hodź. nalětni koncert pola Bizoldec w Haslowje. Wot 15 hodź. poskića tam swačinu.

Městna za putnikowanje na Morawu hišće swobodne

Składnostnje 1.150. róčnicy přichada swjateju Cyrila a Metoda na Morawu planuje Towarstwo Cyrila a Metoda z.t. wot štwórtka do njedźele, 4. do 7. julija, putnikowanje wěriwych ze serbskich wosadow na Velehrad. Někotre městna su hišće swobodne. Štóž ma zajim, so na tutym putnikowanju wobdzělič, njech so skazanja hotela dla hač do pjatka, 12. apryla, w redakciji Katolskeho Posoła přizjewi, telefonowe čisło (0 35 91) 55 02 12.

Putniskej jězbje do Heiligenstadta a Korutanskeje

Lětušej putniskej jězbje z Tereziju Kubašec powjedzetej putnikow do Eichsfelda a Korutanskeje. Přenja budže wot póndźele do srjedy, 3. do 5. junija, přenocowanje je w Heiligenstadće planowane. W nazymskich prózdninach je tydženska putniska jězba do Tinje w Korutanskej předwidžana, a to wot soboty do soboty, 19. do 26. oktobra. Dalše informacije poda a přizjewjenja přijimuje Terezija Kubašec w Radworju, telefonowe čisło (03 59 35) 2 04 25.

Maćična akademija wo lužiskich šesćiměstach

Měrcin Brycka, z Kubšic pochadźacy młody serbski stawiznar, přednošuje štwórtk, 11. apryla, w 19.30 hodź. w Budyskim hosćencu „Wjelbiku“, Žitna 7, na temu „Mjez wobchowanjom statusa a marginalizaciju. Hornjołužiske šesćiměsta wot krizy českeho zběžka stawow hač ke kónceju Třicecílětnjeje wójny“. Za swoje magisterske džělo na tutu temu bu Měrcin Brycka w lěće 2011 z Mytom Hermanna Knothy Hornjołužiskeje towaršnosće wědomosćow w Zhorjelcu wuznamjenjeny. Přednošk je w němskej řeči, zastup je darmotny. Wšitkich zajimcow stawizniska sekcija Maćicy Serbskeje wutrobnje přeprošuje.

Trudla Malinkowa, předsydk